

Ministarski sastanak Upravnog odbora u New Yorku

Povodom sastanka ministara vanjskih poslova zemalja članica Upravnog odbora Vijeća za implementaciju mira održanog u New Yorku 22. septembra 1999. godine, Visoki predstavnik Wolfgang Petritsch je izrazio svoju zahvalnost na jednodušnoj podršci koju je dobio za svoj novi strateški pristup.

Odbor je pružio snažnu podršku njegovom konceptu "odgovornosti" koji naglašava činjenicu da su rukovodstvo i vlasti Bosne i Hercegovine ti koji su prvenstveno odgovorni za implementaciju Mirovnog sporazuma, a ne međunarodna zajednica. Ljudi u Bosni i Hercegovini moraju preuzeti "odgovornost" za svoju budućnost.

Odbor je isto tako izrazio ozbiljnu zabrinutost da zemlje iz regiona koje su potpisnice sporazuma iz Dayton/Pariza nisu ispunile svoje obaveze u njegovoj implementaciji. U ovom pogledu oni su se posebno osvrnuli na Hrvatsku i SRJ.

Visoki predstavnik je isto tako pozdravio ponovnu potvrdu Odbora da se Bosna i Hercegovina nalazi u središtu sveukupnog pristupa međunarodne zajednice ovom regionu, te da se buduća integracija zemlje u evropske institucije nalazi unutar okvira koji je uspostavljen Paktom stabilnosti.

U ovom kontekstu, Upravni odbor je također naglasio potrebu da vlasti u BiH u potpunosti sarađuju sa ICTY-em jer jedino ispunjavajući svoje obaveze u skladu sa međunarodnim pravom one mogu očekivati da budu uključene u evropsku porodicu nacija.

Visoki predstavnik je također preuzeo na sebe da energično djeluje u skladu sa željom ministara da se uhvati u koštac sa "zlom korupcije". Odbor se složio da je ovo prije svega

problem BiH vlasti. Međutim, međunarodna zajednica bi trebala ohrabriti javnu odgovornost i transparentnost i obezbijediti okvir za neophodne ekonomske i institucionalne reforme.

U ovom pogledu Upravni odbor je također istakao važnost medija i novih informacijskih tehnologija, poput Interneta u unapređenju modernih ekonomskih praksi, obrazovanja i učešća javnosti kao i interakcije.

Visoki predstavnik očekuje nastavak bliske saradnje sa Upravnim odborom.